

四庫全書

史部

欽定四庫全書

史部  
江西通志卷二十一

詳校官監察御史臣左同

檢討臣德生覆勘

總校官知縣臣楊懋珩

校對官中書臣湯吳垣

謄錄監生臣李逢泰

欽定四庫全書

江西通志卷二十一

書院

古之學者術序黨庠大夫歸老教於其鄉匪曰師儒  
緊惟父兄靡德不祖靡材不良書院之設此意未亡  
唐宋元明歷盛西江迄乎

聖朝理學大昌鶩湖鹿洞爰逮豫章天經地緯

御書煌煌日星雲漢千載用光作書院志

南昌府

豫章書院在進賢門內初自南宋明萬歷間巡撫凌雲  
翼潘季馴先後修葺改祀宋元明諸儒稱豫章二十  
四先生祠

國朝康熙二十八年巡撫宋犖改立理學名賢祠三十  
一年巡撫馬如龍復葺祠右書院歲久傾圮三十六  
年巡撫白潢即舊址重建書院右為講堂左為祠仍  
祀先賢名儒旁列號舍數十間觀風所錄士之俊者

胥令誦讀其中延原任通政司參議建昌魯瑗主講  
席偕學使王思訓捐俸給廩餼復購十三經二十一史  
唐宋大家文集先儒語錄貯院中五十七年疏請  
聖祖御書五十八年

頒賜章水文淵四大字懸之講堂與鹿洞鵞湖相埒五十  
九年瑗卒復延原任興國知縣張尚瑗主教六十年  
巡撫王企靖延湖廣原任詹事府中允宋如辰主教  
雍正二年巡撫裴率度復加脩葺延在籍鄉紳主講

席五年署巡撫邁柱繼其事

東湖書院在府治東南隅宋嘉定間郡丞豐有俊因李  
寅涵虛閣故址創立以館游學之士賜額於朝今為  
南昌縣學

宗濂精舍在省城得勝門外龍沙岡即唐觀察使路嗣  
恭故宅宋淳祐二年知隆興府江萬里奏建祀濂溪  
先生以先生嘗令南昌配以張子二程子朱子理宗  
御書賜額吳泳記元元統中改為新建縣學後廢為

玉虛觀元郡人萬一鶚熊朋來等別剏宗濂書院於  
府東南今廢

龍岡書院有三俱在龍沙岡亦名隆岡書院一宋進士  
劉邦本建一宋鄉貢進士李天福建一吳尚書桂芳  
講學處即今龍光寺

羅原書屋在南昌西鄉地號羅家原為豫章先生羅仲  
素故居仲素徙閩其地屬萬氏明嘉靖間萬光祿思  
默嘗即其地構屋數楹同鄧定宇李見羅章本清王

塘南鄧潛谷諸子講學其中羅文恭洪先題額曰羅原書屋

正學書院在進賢門內舊貢院址即宸濠陽春書院也  
嘉靖元年於此試士三十四年火三十五年學使王宗沐創祀濂溪明道伊川三先生廣為號舍可容生徒數百人額曰正學書院羅洪先有記萬歷中學使沈九疇重脩

國朝順治間仍改貢院後移貢院於東湖北止存故址



虎溪書院在新建忠孝鄉琚塘亦名虎溪精舍唐婺源  
程天器刺洪州即家於此始置飛麟學塾至宋嘉定  
間其孫必東必簡先後登進士因改為虎溪書院元  
虞集有記

秀溪書院在新建北鄉宋安撫使王明訪鄧晏典教郡  
庠二載辭歸生徒願執經從之者衆乃度地創院中  
設夫子位翼以顏曾思孟詳孔武仲記

香溪書院在新建北鄉宋邑人鄧武建

東山書院在新建忠孝鄉宋邑人羅伯高建白鹿洞院  
長亦初東山書院於二十都虞集有詩

竹梧書院在新建桃花鄉宋邑人裘萬頃所構生徒雲  
集萬頃與同里胡桐原萬澹菴徐竹堂往復唱和時  
稱四傑

萬坊書院在新建南鄉宋邑人萬驥建

柳塘書院在新建二十一都宋邑人鄒一唯建

三洲書院在新建二十四都宋邑人夏文政建夏九疇

有三洲書院賦

五溪書院在新建忠孝鄉宋邑人丁鏞建

丹陵書院在新建象牙潭明正德間魏恭簡良弼講學處今為丹陵觀

洪厓書院在新建洪厓鄉明李遷建

清溪書院在新建二十一都明喻南嶽建又喻均建有鹿溪書院

樞山書院在新建忠孝鄉明熊璽建旁有文池亭

浯溪書院在新建二十五都明譚煥建

雲中書院在新建梅嶺明李耿建

羅溪書院在新建青岡明鄧文潔以讚建

檀溪書院在新建桃花鄉邑人熊文舉建一名淇園有

檀溪唱和詩

界壇義塾在新建盡忠鄉明熊曦建熊文舉復新之

霞源義塾在新建游仙鄉明邑人公建置田延師課業

姜曰廣有記

香城書院在香城寺傍明謝廷傑建并捐租以充會費

石井書院在新建一都泔湖姜曰廣建

章江書院在省城石亭寺

國朝順治間巡撫張朝璘建熊文舉記

蔡公講堂在省城得勝門外

國朝順治間紳士為巡撫蔡士英建中為正誼明道堂

黎元寬記之

西昌書院在新建縣治旁

國朝順治間知縣魏雙鳳建鄒度珙記

洪都書院在新城門外隆興觀

國朝康熙元年巡撫董衛國建熊文舉記

劉公書院在東湖廣濟橋西北

國朝康熙九年布政使劉捷建

韓公書院在章江門外大街

國朝康熙十年糧儲道韓廷芑建

宸箴書院在水巷口

國朝康熙十四年分巡南瑞道李世昌建

邵公講堂在南昌府學內

國朝康熙十五年為提學邵遠平建

元鈞書院在東湖吉祥寺右

國朝康熙十五年糧儲道李月桂建

槐蔭書院在東湖吉祥寺右

國朝康熙十七年布政司王新命建

江渚書院在章江門外滕王閣北

國朝康熙十八年知縣楊周憲重建為諸生課業之所  
徐孺子書院在豐城縣櫛山南亦名讀書臺

盛家洲書院在豐城縣東藍家巷宋邑人盛溫如建朱

子過之有詩

龍光書院在豐城滎塘劍池廟左宋紹興間邑人陳自  
俛建四方來學者三百餘人悉廩之朱子曾過書院  
留居一月元至正間裔孫陳必強宗強重建有歐陽  
圭齋篆額明嘉靖十年知縣沈熺奉提學徐一鳴檄



改建儒學西

蓮溪書院在豐城小塘宋侍郎李從建招周諤講學於此臨池有蓮故名

石峰書堂在豐城梅仙鄉宋里人方齊陳友沅因其師雙峰饒氏遂創堂講學於此

敷山書院在豐城同造鄉宋邑人孫餘慶建揭傒斯記貞文書院在豐城長寧鄉元揭傒斯請於朝為其父貞文先生來成立至正間請建書院賜額選山長主之

歐陽圭齋記

同文書院在豐城湖茫元李克家建克家字肖翁凡鄉  
人有志於學者聚而教焉買田以給之

舊岡義塾在豐城長寧鄉元揭惠建中奉先聖旁以處  
學徒規制如貞文書院有贍學田五百畝吳澄記之  
城南書屋在豐城荷塘明永樂間羅懷玉建金幼孜記  
羅山書院在豐城湖茫明嘉靖間李遂建

劍東義館在豐城袁坊明嘉靖間袁伯明建前為樂育

堂後為養善堂翼以號舍庖湑悉具捐腴田二百二十畝以給就學者之費

寶修書堂在豐城正法寺左明隆慶間參議徐用檢建  
龍門書院在豐城儒學右明崇禎間知縣謝龍文建

近聖會館在豐城儒學左

國朝順治間知縣宗彛建

徵士書院在進賢縣啓和門外明正德七年改東壇廟  
為之嘉靖間知縣程光甸修天啓間魏忠賢廢毀天

下書院改為迎春亭

鍾陵書院在進賢縣霧嶺明正德七年改福勝寺為之  
立濂溪先生祠中有光風霽月堂明通公溥四齋李  
夢陽記

棲賢書院在進賢縣棲賢山即唐撫州刺史戴叔倫故  
居明萬歷間知縣黃汝亨建前為明經堂後為寓閣  
翼以號舍自為記

梧桐書院在奉新縣羅坊鎮南唐羅仁節仁儉講學之

所山多梧桐故名學者稱仁節為中庸先生仁儉為  
誠明先生

華林書院在奉新縣浮雲山宋雍熙中邑人胡仲堯家  
塾徐鉉有記

龍洲書院在奉新縣宋直學士余驥建

三賢書院在奉新縣寶雲寺西祀宋周濂溪蘇東坡黃  
山谷至元間邑人鄧謙亨建歐陽圭齋記之

四賢書院在奉新縣東門外祀宋周濂溪蘇東坡黃山

谷楊誠齋明萬歷間知縣馮焜建自為記

國朝順治間知縣胡以溫重建

吟溪書院在奉新縣明陰鏗建黃孟載有吟溪題詠

東甌講堂在奉新縣馮水北

國朝順治間知縣胡以溫建

東窓義館在靖安縣益田明嘉靖間陳大鴻建聚鄉族

貧子弟教之

有造義塾在靖安縣城北隅

國朝康熙三十年知縣高克藩建置田三十畝為每歲  
延師費自有記

柳山書院在武寧縣柳山唐柳渾隱此築室讀書宋紹  
興間燬而復建明成化間知縣馮琦因舊址再建有  
記

雲龍書院在武寧縣脩江東明萬歷間知縣陳子侃建  
中有講堂號舍凡四十間後因水沒知縣朱士佳遷  
建西門

濂溪書院在寧州治東旌陽山麓濂溪先生任分寧時  
創書院以延四方游學之士後人因以名元季兵燬  
明天順三年知縣羅珉重建成化十四年知縣蕭光  
甫復新之彭載記弘治十六年巡撫林俊檄知州葉  
天爵增脩萬歷間知州方沆復修

國朝康熙七年知州徐永齡重建其右有山谷書院

徐氏書院在寧州宋邑人徐德占所築即羨魚亭故址

黃庭堅有詩



櫻桃書院在寧州崇鄉雙井宋邑人黃中理建

山泉書院在寧州治北社稷壇西明嘉靖間知州蔣芝奉詔建內有習禮聽樂句讀書筭四堂號房十二間庖湏俱備隆慶丁卯知州黃誥又立敬義文會所萬歷間廢

瑞州府

桂巖書院在高安縣調露鄉唐幸南容創宋幸元龍重新之有記周益公必大題額成化間幸順迪重建劉

革記

筠陽書院在府治水南朝天坊宋州學基也紹興二十二年學徙廢為廣福寺明正德八年寺廢知府鄺璠建堂八所榜其門曰筠陽書院有記嘉靖間推官潘仲驂重葺吾與堂置田徵租以贍學者祀濂溪明道伊川橫渠朱子象山陽明七先生羅念庵記萬歷初奉文毀賣侍郎傅孟春捐銀抵值越五年知府周之基奉詔重修傅孟春記天啓間魏璫盡毀天下書院

奉檄甚亟知府陶履中以改建公署申報明末傾廢  
國朝康熙九年知府劉登科重建復為捐俸置田

樂善書院在府治西宋知州王淹建以訓宗室之子弟  
開府儀同三司趙不黥崇祀於此不黥太祖六世孫  
西澗書院在高安新豐鄉釣山宋屯田員外郎劉凝之  
讀書處幸元龍有冰玉堂記

文溪書院在高安縣新豐鄉宋咸淳末邑人陳仲徵建  
槐東書院在府治南槐山明正德間謝廷建熊相記中

有先師堂光霽亭賢游亭退省軒竹風亭晚秀樓感  
道閣洗硯池廖暹有槐東八詠

尊道書院在府治南舊為廣信寺嘉靖己丑改為小學  
丁未知縣潘仲儒建有亭堂號舍置田贍來學者邑  
人謝與棟講學其中鄒守益記

南嫫書院在府城一笑橋西明吳江吳匯兄弟讀書於  
此

息園書院在高安縣碧落山明徐瑒如建

傍蓮書院在郡城南明邑人劉慟子講學處劉自署柱  
聯云數十年鉞斫纔逼出一盤惡衣惡食之恥皮毛  
腸胃灑然輕二三子切磋莫夸張幾部多聞多見之  
奇徑路坵壇平處實其為學之功可想也

正德書院在上高縣蒙山元至元間提舉姜榮建有大  
成殿兩廡明倫堂致思堂佑善堂先賢祠分六齋課  
士趙子昂題額吳澄記延祐二年提舉陳以忠重脩  
姚雲記又鄒民則有書院田記

金石書院在上高儒學前明嘉靖間御史尹敏生建  
國朝康熙十年知府劉登科重建陳常記

留餘書院在上高縣大東門外明萬歷中僉事李偕建  
聯璧書院在上高縣田北明末王徽建子鼎堅記之

義方書院在新昌縣治東宋處士蔡誼築室百楹以館  
來學者元提舉胡俊孚重修

熊氏書院在新昌縣北四都宋糧科院熊襄讀書處元  
末廢今其地土人名曰書林

虞氏書堂在新昌縣五峰山宋大觀中虞氏建崔鷓記之

梅花書屋在新昌縣三十三都宋孝廉熊良翰講誦之所

志學精舍在新昌縣十七都宋孝廉郭廷發與兄松容弟梅莊講肄之所其歲書樓曰梯雲樓

荷溪書堂在新昌縣十七都元李希周建姚雲記之

石溪書院在新昌縣義鈞嶺下元提舉胡俊孚建延請

姚雲為山長

漆氏書堂在新昌縣東頭塘元教諭漆文可建明永樂  
中進士漆遠方復新之主事歐陽正記一名養正書  
院

寶善書堂在新昌縣治東明永樂中漆用常建

尉山書院在新昌縣蕩石明劉全曜即梅子真墓側建  
書院又曰悅雲山莊

曲江書院在新昌縣二十二都明毛懋諫建聚俊秀講



學其中

四知書院在新昌縣北城外明胡學新建

文昌書院在新昌縣治左

國朝康熙五年知縣黃運啓建樓三楹中祀文昌左右  
為諸生肄業所

袁州府

昌黎書院在府學西即文公祠明嘉靖間知縣徐棡改  
為書院知府汪若冰脩之彭自新記久圯

國朝康熙三年守道施閏章知府李芳春重建推官鄭  
燝記之

南軒書院在府城東湖上本南軒祠宋端平中州守彭  
方建元至元間總管張熙祖重修虞集記

六柳書院在宜春縣橫塘明進士袁魯訓及江督袁繼  
咸讀書處也

秀江書院在府城西明嘉靖間籍嚴氏產入官撫按允  
府議改為書院課士

高士書院在府城北學宮右明萬歷癸巳提學錢櫛建  
祀鄉賢袁京自為記

王公書院在府城東門外明侍御王相說建姜曰廣記  
之

鈐岡書院在分宜縣治東宋淳祐初縣令王杭改卜西  
郊建祀濂溪橫渠二程朱子仍舊名明崇禎癸未燬  
於賊

宗濂書院在萍鄉縣東蘆溪鎮宋周濂溪先生監稅是

鎮嘗立書院以教授後人即其地建祠又於縣治南  
立濂溪書院元末兵燬明弘治間知府朱華重建  
東軒書院在萍鄉縣東二里宋朱子門人胡安之讀書  
處

昌文書院在萍鄉縣西明嘉靖間同知楊自治知縣蔣  
時謨先後成之萬歷戊寅署縣同知陶之肖重修  
煥文書院在萍鄉舊學基

國朝康熙七年知縣孟宗舜建

張巖書院在萬載縣西獲富里元臨江儒學教授張千  
崖立有禮殿以祀先聖有祠以奉周程張邵司馬六  
先生張沒其甥萍鄉榮氏率族人子弟就學焉虞集  
記

畫永書堂在萬載縣建成坊明洪武間長史龍鐔立  
塢溪書院在萬載縣治東明永樂間左布政易節建  
圖南精舍在萬載縣貫邑明永樂間孝廉楊資讀書處

蕭韶記

綠陰書屋在萬載縣治西南明永樂間郭彥正建以課  
其子弟彥正子瑾永樂甲辰進士仕至刑部侍郎周  
叙記

桐岡書屋在萬載縣治東北明永樂間劉文忠因山水  
之勝結屋藏書以教子胡儼潘文奎均有記文忠字  
蓋成永樂乙未進士仕至刑科給事中

朱溪書屋在萬載縣西朱溪橋明處士李克恭建延師  
以訓鄉里之俊秀者

三峰書院在萬載縣東門外明龍國臣建

鳳鳴書屋在萬載縣石頭山明嘉靖間孝廉彭澄建

萬松書屋在萬載縣治東明晏朝瑞建因其地周遭萬

松故名

竹泉書屋在萬載縣東明處士歐陽恕建

綠筠書屋在萬載縣北門外明辛滔建教諭藍潔記

步雲書院在萬載縣明楊嘉和建

吳令講堂在萬載縣康樂坊

國朝康熙間知縣吳自肅建宋繼種記又知縣常維禎  
建講堂於儒學右教埭記之

臨江府

清江書院在清江縣治東宋著作郎張洽建

金鳳書院在清江縣金鳳洲宋國子司業黎立武建

蕪林書院在府城東門外宋侍郎向子誣致仕歸里築

別墅明嘉靖間知府李槃於其址建書院

仰高書院在臨江府學東明嘉靖間知府李槃建今名



文峰樓

石龍書院在城府南明嘉靖間知府錢琦建

明經書院在府學內啓聖祠左明隆慶間知府管大勳  
建號舍六十間知縣陸書續置膳田劉松記

明宗書院在府城南薰門內明崇禎間知縣王心純建  
復置田五十畝自為記

樂育書院在臨江察院行署前

國朝順治八年湖西道蔣顯捷建

蕭江書院在清江縣治南

國朝順治八年知縣洪其清建

雲巖書院在府城孝感坊

國朝康熙二年知縣張暎建

龍岡書院在清江縣章山

國朝康熙六年湖西紳士為參議施閏章建李元鼎記  
惜陰書院明成化間僉事陳奇於陶侃讀書臺下建立  
書院設桓公像以靖節配之提學夏寅扁今名寅與

羅倫並記之後漸頽廢崇禎間知縣周文膺復修

國朝康熙元年參議施閏章講學臺下知縣胡之霖重建并移黃勉齋木主並祀焉

高峰書院在新淦縣治東宋縣令黃勉齋建明嘉靖元年知縣田邦傑重修知府徐問有記隆慶三年知縣李樂改建於儒學內題曰勉齋祠明末廢

國朝康熙四年知縣胡之琳移建惜陰書院舊址

金川書院在新淦縣治東北正德間提學李夢陽建祀

練忠貞子寧題其堂曰浩然有記隆慶間知縣李樂  
重修姚翼記萬歷庚寅知縣楊宏科移建儒學右祀  
忠貞及其父伯尚後令王立穀增脩聶心湯記

求仁書院在峽江縣鳳皇山下一名自靖祠明嘉靖間  
知府錢琦建祠練子寧後通判何堅改建於山麓羅  
洪先記

觀瀾書院在峽江縣大安橋左明萬歷中知縣鄭燿建  
規制闕殿日與諸生會講其中徐必登記復置齋田

自為記

國朝雍正六年署縣事景四維因田興設義學

蒙山書院在新喻縣北蒙山之麓宋司業黎立武建倣  
嘉眉故事禮先達以主試月講季課春秋行釋菜禮  
四方來學者雲集及院廢鄉人謂其地曰狀元講書  
堂

石門書院有二一在新喻縣蒙山明洪武初梁寅建寅  
字孟敬應召入都議郊祀禮成辭還隱居石門聚書

以遺子孫名曰書莊學者稱為石門先生一在新喻城東保障坊右即石門祠也侍讀張春有記

吉安府

鳳山書院宋開國男魯宏甫覓城西隙地創建置養士田元初以山長領教事大德間罷至正三年縣尹管文通重新之劉詵記見桂隱集

白鷺洲書院在府城東白鷺洲上宋淳祐間州守江萬里以程大中先生嘗為廬陵尉乃即是洲建書院以

祀周三程張朱六君子有文宣王廟櫺星門雲章閣  
道心堂萬竹堂風月樓浴沂亭齋舍庖湑具備理宗  
御書額之置田租八百石有奇繞城濠池歲入租銀  
五十兩贍學徒尋即以祀江文忠劉辰翁記其略元  
設山長一員時黃嘉領教事建山長廳歐陽守道記  
之延祐間有奉浮圖教者在書院傍山長余天民請  
於總管府撤之立復古亭由是四圍民居隙地悉屬  
書院至正乙未總管納速兒丁重修吳思永記明季

知府汪可受重修劉應秋記

國朝雍正三年知府吳銓重修以居生徒興義學

光祿書院在廬陵淳化富田宋開寶二年邑人劉玉建

鳳岡精舍元延祐甲辰詔興學校推官陳孝祥州判楊

應星構精舍於廬陵永和鎮奉夫子燕居像以魯子

附朔望率鄉士肅拜二仲丁日行釋菜禮元末兵燬

明洪武初稅課使魏秀重建

梅溪書室廬陵羅宗智建以藏書又推以教其子孫及



鄉之後秀楊士奇有記

西原會館在廬陵能仁寺左明隆慶間建有田以贍士  
鄉先生陳蒙山王塘南賀定齋輩相繼主教事來學  
者常數百人每歲季月小會九月大會賀泚有西原  
敬止堂記崇禎二年火知府吳 率紳士重新劉遇  
奇有序

益公讀書臺在府城南學宮宋丞相周必大讀書於此  
明學書院在廬陵儒林鄉明魯養全建祀文天祥胡銓

周必大顏端明羅韜五君子南阜鄒元標記

依仁書院在郡城內榻水橋明李忠肅邦華建以講學  
黃道周侯峒曾題額巡撫解學龍記之

景賢書院即仁壽山景賢堂

國朝康熙五年守道施閏章講學於白鷺洲士人病涉  
爰就景賢堂舊址初建書院侍讀張貞生記

匡山書院在泰和縣東匡山下南唐邑人羅韜隱居不  
仕長典間以博學能文徵授端明殿學士以疾辭歸

乃建匡山書院聚徒講學重和間孫羅弘重葺明永樂中裔孫羅汝止新之鄒幼亨記

國朝學士張貞生結茅於此闢舍構亭題詠甚多著有玉山遺響

龍洲書院在泰和縣治南澄江上亦名鷺洲書院宋嘉泰間建甃石為基創至二十楹擇春秋補試前列者居之立庠長周必大有記謝枋得有跋後圮於水明弘治中知縣楊南金改濟渡菴為之仍額舊名

雲津書院在泰和縣龍洲上宋嘉定間邑人劉逢原建  
逢原銳意正學鄉人爭師之曾歷記

清節書院在泰和縣治北宋蕭子荆講學其中建炎四  
年卒門人私謚清節元至正辛卯清節宗人繼文即  
其地建書院立祠祀之仍置田聘名師以教來學者  
文溪書院在泰和縣治西二里宋邑人曾季永葺於  
此紹興間趙師夔記之久廢明弘治間知縣楊南金  
改西溪寺為之

柳溪書院在泰和縣治西白鶴觀右宋邑人陳德卿建  
中有湧翠堂臨靜齋雲錦坡筠坡臺諸勝嚴萬全記  
朴山書院在泰和城西元邑人嚴周父建聚學徒於其  
中規制一依白鹿洞明初其從孫國子學正從禮重  
新之周是脩記從禮之孫士臧復建彭百鍊記

武山義塾在泰和縣汶溪側明洪武初國子學錄蕭執  
以親老乞歸其鄉人就學者日衆同里蕭鵬舉廬陵  
王伯衢兄弟相與成之中為講堂旁列號舍宋濂題

額劉楚記

南薰書院明永樂中泰和石臺蕭氏剏劉東園子彥教授其中梁潛有記見泊菴集

萃和書社在泰和縣儒學右即大塢寺故址明嘉靖間郭應奎建胡松記萬歷間知縣濮中玉重修

清風書院在泰和縣南四十里明知縣楊南金毀螺山淫祠建見西昌存古錄

靜齋書院在泰和城南龍洲上明御史陳文鳴建初為

休笑菴正德間詔毀天下額外寺觀文鳴因佃是菴  
為之既而拓其基作高漚草堂三間觀蓮軒綠野堂  
萬卷樓各為廂房以居游學者羅欽順記

白雲書院在吉水縣治北宋邑人陳子張所築曾鞏記  
之

礮溪書院在吉水縣同水鄉宋周澤之建

龍城書院在吉水縣七都宋曾無疑建無疑名三異嘗  
與朱子論揲筮之數學者稱雲巢先生

文昌書院在吉水縣文昌鄉元翰林編脩王相建以教其鄉之子弟及四方從游者明初王氏重修之

白沙書院在吉水縣文昌鄉元時白沙張氏所建劉岳申有記

仁山書舍在吉水縣南文江明洪武初邑人劉惠庭建其子子齡增構館閣亭軒聚古今圖書以待來學者  
解縉記

竹林書舍在吉水縣明洪武間邑人陳秉獻秉哲兄弟



絃誦之所解縉記

同江書院在吉水縣西同水鄉明尚書曾同亨建同亨  
事羅文恭胡廬山講致良知之學

復初書院在吉水縣西門外明司馬毛伯溫故居縣令  
陳王輝建復初書院以祠之且俾諸生講業焉

仁文書院在吉水縣東門外明知縣徐學聚建為鄒南  
臯講學所南臯有記萬歷中毀尋復天啓間魏璫折  
毀追價崇禎壬午知縣沈中柱奉憲檄修復李日宣

記

國朝康熙二年知縣某拆修湖西道公署守道施閏章  
責令重建李元鼎記其略

瀧江書院在吉水縣文昌鄉明知縣沈裕建

養中書院在吉水縣東虎邱山明知縣劉成建

四壁皆錄儒先語又大書誠明敬義四箴以示學者

曲江書院在吉水縣三曲灘明知縣羅匡湖建

江陽書院在吉水縣五都元潭明知縣羅文恭洪

先

崇桂書院在吉水縣二十都烏江明鄒元標講學之所  
泮東書院在吉水學右舊為鄒南皋會講地邑人鄒劉  
周李四姓公建

求仁書舍在吉水縣學堂寺明萬歷間邑人為胡直建  
直字敬方學者稱西澗先生

皇寮書院在永豐縣二都渝洲唐劉慶霖為吉州通判  
流寓水豐建書院以講學其十二世孫劉琰重建周

雲朱輿言均有記

清風書院在永豐縣秋江宋觀察推官劉禹錫淳熙間  
致仕歸築清風臺吟詠其中後改書院

湖頭書院在永豐縣治西宋邑人金汝礪聚徒講學之  
所明永樂間裔孫金從緘重修

武城書院在永豐縣西遷鶯鄉元學士曾德裕創祠先  
聖先師以其父武城伯晞顏配享宗黨來學者居之  
移文集賢院朝議可之俾曾氏子孫賢者掌其教吳

澄記

志歐書院在永豐縣西平湖元延祐間學士曾靖翁建  
中構聖殿左為歐陽公祠前為講堂翼以兩廡四齋  
又置贍田五百畝生徒來學者常百餘人杜顯祖記  
陽豐書院在永豐縣治西藥師寺後元至元間進士陳  
應沐與弟起鳴起元建規制如儒學延祐四年賜額

吳澄記

浮雲書院在永豐縣鷲溪雞山之陽初名道院後更書

院元劉鶚建以教其鄉族子弟置贍田若干畝揭奚斯記之歐陽元賦之元末兵燬明初鶚子公鐸重修楊士奇曾榮俱有記

中山書院在永豐縣秋江元至順間翰林待制陳植謫博羅令歸建書院

金牛書院在永豐明德鄉金牛洞明成化間修撰羅倫藏修之所

龍雲書院在永豐縣東湖明南京兵部主事劉忠講學

處忠字顯仁以古人實學自期閩楚浙蜀之士來學者甚衆建書院以居之

一峰書院在永豐縣儒學西明弘治間知府張本知縣鄭濬建祀一峰羅倫邵寶記

六一書院在永豐縣西石橋寺明嘉靖間知縣張言建祀歐陽文忠鄒守益記

秀溪書院在安福縣西三十里宋嘉泰間邑人周奕建講經有堂諸生有舍叢書其間楊萬里記見誠齋集

石岡書院在安福城東南三十里宋蕭儀鳳始創書院  
宋末燬於兵儀鳳從孫徙梅溪復創之元季又燬梅  
溪之孫三溪復創之明永樂中名士共為詩梁潛作  
序楊士奇記之

竹園書院在安福縣治南宋劉弘仲建朱子胡文定俱  
有詩明永樂間邑人孫大淵修李時勉記之

安田書塾在安福上田鄉元天歷間李辛翁建禮殿設  
講堂置齋舍贍田吳澄有記



書岡精舍在安福縣治南明洪熙間張衡建吳與弼記  
前溪書院在安福縣治南明弘治間劉教建崔銑記

復古書院在安福縣治南門外即舊學基明嘉靖間知  
縣程文德建中為文明堂後為茂對堂尊經閣忠信  
篤敬兩齋號舍庖湑俱備程文德與聶豹鄒守益各  
有記隆慶間知縣李忱修之劉陽記書院田萬歷九  
年奉文變賣後知府余之楨知縣閔世翔增置立三  
先生祠祀王文成程文德鄒守益二賢祠祀布衣劉

文敏劉肇袞王時槐記

復真書院在安福縣治南五十里即北真觀廢址明嘉靖戊午邑人公建中為講堂後為聚奎樓祀劉文敏劉邦采劉陽尹一仁四先生樓後為堂專祀鄒東廓以朱調王鑄王釗朱叔相等從祀焉堂前為萃勝樓以藏書聶豹羅洪先各有記

國朝康熙三年王吉周煥倡修施閏章記

復禮書院在安福縣治西明隆慶間邑人劉元卿倡建

中為明德堂後為留帖閣公捐田并山林莊屋萬歷  
間陳國相捐田三十畝每歲於書院講鄉約舉文會  
識仁書院在安福縣治西明萬歷間王師仁同士民公  
建中為志學堂前為復初堂中祀瀘瀟先生劉元卿  
以西里諸賢附焉

國朝康熙初里人姚開逖倡修

任仁精舍在安福縣治北舊為鄒太常善講學地御史  
朱鴻謨即其地為祠祀之

道東書院在安福縣治東祀李忠文時勉及劉廉節劉  
養沖彭石屋諸人張召南記

近聖會館在安福縣治南邑人朱叔相建

中道會館在安福縣西洋澤萬歷間士民公建劉元卿  
記

龍溪書院在萬安縣治西宋趙清獻忞守虔周濂溪敦  
頤為司理經游龍溪及香林寺初建濂溪祠久而改  
為書院中為宣聖像傍列周子二程以配祀明洪武

間修之黎奎解縉各有記

國朝康熙間知縣胡樞黃圖昌相繼修復

昂溪書院在萬安縣昂溪里為宋儒段奎齋講學處文  
文山顏而記之

儒林義塾在萬安縣鄧林街元劉桂平建設塾延師凡  
黨里子弟童蒙以上悉許來學施田若干畝吳澄記  
屏山書院在永新縣南山元大德間邑人劉南可建聚  
徒授學後改為紫霄觀

崇正書院在永新縣鳳尾湖明嘉靖間尚書尹臺建有  
記見洞麓堂集

鵞峰書屋在永寧縣治南明知縣陸時雍建有記

撫州府

臨汝書院在府城西南二里宋淳祐九年馮去疾提舉  
江南西路以朱子嘗臨是邦故立書院祠之規畫悉  
仿學制元延祐間燬於火山長黃鎮同知馬合睦新  
之吳澄記至正辛巳照磨王堅孫山長張震重修禮

殿講堂門廡齋舍煥然一新虞集記

峨峰書院在府城南青雲峰左宋嘉定間叅政李昉捐俸同知縣黃幹建以講堂面峨峰故名王克勤記

崇儒書院在府城南祀宋晏元獻王荆公魯文定陸文安元吳草廬明吳康齋薦紳每講會於此明鄒元標有記又陳文燧有書院學田記

碧澗書院在臨川縣銅陵山陽宋知南康軍晁百談建紅泉精舍在臨川縣銅陵山陽宋曾極建

漁墅書院在崇仁縣東馭巷宋安撫使陳元晉建一名  
文溪書院

成岡書院在崇仁縣二十都元邑人李幼常建儲書淑  
後吳澄記之

草廬書院在崇仁縣東耆小港元至元間監邑阿里建  
祀吳草廬澄

邵菴書院在崇仁縣北郭元至正間監邑重喜建祀虞  
集



巴山書院在崇仁縣石莊明景泰間吳宣建宣字師尼  
為鎮遠知府有野菴文集

小陂書院在崇仁縣小陂明正統間吳康齋講學於此  
時陳獻章胡居仁胡九韶諸儒俱從游焉後即為祠  
亦名康齋書院

寶唐書院在崇仁縣學後明萬歷間知縣李紹春建義  
民謝宗元捐資吳道南記之

文昌書院在崇仁縣治左

國朝順治間知縣謝穎璜建有記

鹿岡書院在宜黃縣鹿岡宋嘉祐間杜子野建王荆公嘗師事子野受業處名峯雲館

定安書院在宜黃縣十九都宋靖康間王革讀書之所遺安書院在宜黃縣待賢鄉宋鄒次陳講學處次陳字周弼中博學宏辭科值革命隱居不仕遠近學者多從之

槐堂書院在金谿縣治西宋紹定間縣令陳詠之建祀

復齋象山兩先生陸氏舊有槐堂因扁以名傳子雲  
記淳祐十年縣令王中立重脩州守葉夢得記之

石林書院在金谿縣西南四十里宋撫州守葉夢得建

明知府周璜題額

按宋史葉夢得字少蘊號石林居士處州人徙湖  
州建炎中官至戶部尚書未嘗守撫而貴溪人葉  
夢得則嘗守撫州但不號石林姑存之以備考

青田書院在金谿縣北三十里乃三陸先生之鄉元大

德間縣尹張居懌特建以祠程鉅夫記

崇正書院在金谿縣治西明嘉靖間知縣馮元鼎建祀  
朱陸二先生王奠記崇禎間兵巡道吳麟瑞重修

象山書院在金谿縣西門外二里明嘉靖間知縣程秀  
民以西升廢寺改祀象山先生兩傍翼以號舍棲來  
學者

心齋書院在樂安縣流坑宋儒董德修師事象山教授  
於家從游者為建書院王畿記中有潛心堂孫潤記

子男書院在樂安縣流坑為宋廬陵開國子董德元長  
清開國男董敦逸立

慈竹書院在樂安縣西宋侍郎樂史建明裔孫樂翰重  
修羅汝芳記

杏塢書院在樂安縣招攜鄉宋里人鄧氏建樽齋曾丰  
記又曾思文建沂水書院於嚴溪

古梅書院在樂安縣衙背宋儒詹元吉由進士授古田  
尉致仕家居味伊洛遺書四方來學者衆建書院以

居之

鰲溪書院在樂安縣治東元邑人夏友蘭建吳澄記友  
蘭字幼菴少從草廬先生游邑尉明安岱爾捐置書  
院田五百畝皇慶元年賜額設官規制與白鹿鷺湖  
等

西溪書院在樂安縣西坑元儒何中建

柳塘書院在樂安縣治東元大德中縣尉明安岱爾建  
龍岡書院在樂安縣龍頭岡元邑人謝均福與其弟均

壽建以講學明天順間五世孫謝輔即其地新之買田以供祭祀束脩之費陳獻章記

卧雲書院在樂安縣招攜鄉明董時紳建龔廷獻記

安定書院在樂安縣治前明胡伯成建祀安定先生羅汝芳記

道鄉書院在樂安縣南鎮安橋明天啓間知縣莊學曾建祀李見羅鄒元標題額

大成書院在樂安縣雲鄉明時里人公建中曰至善堂

董翔鵬記

江西通志卷二十一



欽定四庫全書

江西通志卷二十二

書院二

建昌府

盱江書院在府治北宋儒李覲教授之所有明倫堂洙  
泗堂誠意正心致知格物四齋元季燬地入府治明  
正德壬申提學李夢陽改建於城西街為堂四曰正  
經上達志伊學顏旁列號舍數十間籍淫祠田產以

養士之俊者萬歷間知府韓轍重修增建號舍田汝  
耔記後燬

國朝雍正七年提學傅王雲即廢于公講堂改置

紫陽書院在南豐縣聚和門外明嘉靖間知縣向鶴建  
隆慶戊辰重修趙郡記萬歷間知縣程三省林洪卿  
增葺之

崇儒書院在府城萬壽宮左久廢

國朝康熙五十二年同知郭惟莞重建崇祀朱子又創

號舍以居生徒捐俸置田給膏火焉

圭峰書院在南城縣磁龜明侍郎羅玘建今為文肅祠  
三谷書院在南城麻源明尚書張昇建今為文僖祠

鳳崗書院在南城北關中祀李觀曾鞏何喬新羅玘夏  
良勝崇禎十一年知縣王垣京課士其中為鳳岡大  
社

明德書院在南城鳳凰山下明參政羅汝芳講學之所  
近溪之學本於明德故門人私謚曰明德先生

斗湖書院在府城北興文坊明太常卿夏良勝建

正學書院在南城從姑山北明巡道王儼建祀羅近溪

侍郎張櫟記之

恒山精舍在南城麻姑山麓明王伯昭建宋濂有記

章氏義塾在南城南門章前峰建羅汝芳記

曾潭講堂在南城縣南宋儒傅夢泉師事朱子陸象山

張南軒講學曾潭之許從游日衆構室以居之自為

記

前峰書屋在南城從姑山明羅錦建以教其族黨子弟  
武彛講堂在新城福山雙林寺後宋朱子與門人黃幹  
蔡沈黃鐘講學於此後人為肖象立祠祀之羅倫額  
曰崇正

西村書堂在新城縣西元處士朱民表建以教族黨子  
弟

正宗書院在新城縣北門外一名北田學舍明嘉靖間  
大司成王材講學之所後為學古樓中為念初堂傍

有存誠克己慎動尚志四齋鄧元錫記

廩山精舍在新城縣東北明孝廉鄧元錫處士江如僧  
進士張之竒涂景祚讀書於此

東園書院在新城縣東即皆春堂舊址嘉靖間司空張  
櫛建皆春堂為講學之所黃翹記之萬歷間侍御鄧  
澄讀書其中有三層樓大隱堂德隅堂二酉閣

蕭曲山房在新城縣蕭曲峰明天啓間禮部主事黃端  
伯聚徒教授之所

西城義塾在新城縣上都明邑人楊振邦建有田八十畝供饋食東修之費何宦記

華林書堂在南豐縣王漿源宋孝子瞿元肅達元肅孝行聞於朝祥符九年召見真宗賜御書親王公卿各賦詩待制李虛中為之序

水雲書院在南豐縣水雲村宋劉堽讀書之所堽字起潛自號水村以道學鳴於時

南豐書院在南豐縣治東元至正初知州史文彬率屬

民姚自新建中為聖殿左為曾文定祠後列講堂齋舍內藏全集鐫板有司春秋致祭又南豐學舍為文定當時所建今其址改為啓聖祠

南臺書院在南豐南臺山麓明隆慶二年知縣金文業教諭王棟捐俸創建萬曆間署縣通判薛瀚重脩

清溪書院在廣昌縣新坊里明正統間雲南按察賴巽建

東園書院在廣昌縣東明吏部尚書何文淵讀書所文



淵號東園故名

石岡書院在廣昌縣西明嘉靖間吏部郎李喬建

南郭雲莊在廣昌縣揭坊里明嘉靖間都御史何源藏

書講習之所其孫何三省重脩

進脩書院在瀘溪縣四都宋元豐進士石松建其孫淳

熙進士石致平重脩

菴山學舍在瀘溪縣四都宋宣贊舍人石永壽建

廣信府

帶湖書院在府城北靈山門外宋淳熙間辛棄疾讀書所

道一書院宋程月巖紹開建取孟子道一而已之義中設朱陸二先生像方虛谷有送胡雲峰赴道一書院

山長詩

疊山書院在上饒縣安輯鄉宋謝枋得講學處有詠歸門明經堂其門人鄭康仲徐炎午輩袁田供費元季燬於兵明景泰中知府姚堂遷建於府治南巡撫韓

雍奏請賜諡文節仍命有司春秋致祀具載副使韓  
暘碑正德間知府陸徵重脩學士汪俊記提學邵銳  
以公弟君禹君烈君澤公子定之配享嘉靖間提學  
周廣復新之自撰碑記

白石書院在上饒縣安輯鄉宋儒劉養浩讀書之所其  
孫劉光因創白石書院祀朱子及黃勉齋以養浩逮  
事勉齋不忘教所自也又置田以贍來學者山長聶  
義記之

御書院在上饒縣明遠鄉宋吏部尚書徐直方疏請祀其父忠愍公徐元杰奉勅建院周子正記明嘉靖三十八年知縣陳添祥重修提學王宗沐記

朱氏義學在上饒縣溪南上墩明成化間朱仲舒建以教族黨子弟御史蔣欽記其子汝揚重修尚書楊麒記

聞講書院在府城西明嘉靖間貴溪大學士夏言致政歸以賜金建祀朱子集諸生講學其中再起入都有

懷聞講書院詩今改為分守河東鎮署

忠禮書院在上饒縣西五桂山明隆慶間湖東道尚德  
恒建置有學田今廢為餞送鄉試之所

鍾靈講院在府城外鍾靈橋北

國朝康熙五十一年知府周錞元改曲江書院為鍾靈  
講院延師主之召七邑弟子肄業其中大學士李光  
地有記

懷玉書院唐大歷中僧志初創法海寺於金剛峰下宋

學士楊億精舍亦在山麓後朱子與陸文安汪文定諸賢講學茲山有司及門人拓而大之置田以供四方來學者自是懷玉之名與四大書院相埒宋末廢元時改為僧寺明成化間仍建書院清復原田正德間提學李夢陽重建勒石記之既而宸濠兵變復為僧踞嘉靖間提學王宗沐以左道宜斥請於撫按檄有司改復書院悉如白鹿洞規制置書院田三十三頃以贍學者自後知府姚體信脩之萬歷辛巳詔革

天下書院遂廢具詳知縣唐世徵記畧

國朝重建於端明書院故址崇祀朱子陸文安汪文定  
呂東萊益以汪達劉允迪詹叔善及有司之有德於  
王者康熙五十七年巡撫白潢顏其額曰尋孔顏樂  
榜聯云修身誠意正心致知格物先齊其家孝事君  
弟事長 博學審問慎思明辨篤行果能此道愚必  
明柔必強

端明書院在玉山縣治東宋端明殿學士汪應辰講學

處元監縣壽安為建書院置學田蘇天爵記後毀為  
湖東道署景泰間知府姚堂改祠城隍廟東李奎記  
正德辛巳御史唐龍檄知縣潘文明重建萬歷庚辰  
知縣周日申更置端明祠於縣西馬院巷

草堂書院在玉山縣北懷玉山下朱子講學於此有青  
山綠樹亭源頭活水亭堂廡號舍具備相傳朱子題  
山下酒舍一聯云泉飛白石堪為酒竈傍青山不買  
柴即其地也宋末懷玉書院廢斗山王奕與其子介



翁結廬居此因名草堂斗山與謝疊山友善疊山既  
仗節斗山自號至元逸民明天順成化間知府姚堂  
知縣汪濛相繼修理查復原田入院正德六年提學  
李夢陽檄知縣譚世熙新之

劉氏義學在玉山縣順成鄉宋德安令劉允迪家居時  
建朱子有記元至元九年監邑壽安重修朱德潤記  
明裔孫劉文秀重建

藍山書院在弋陽縣治南宋邑人張弼登咸淳戊辰

進士仕興化倅宋亡隱居教授其門人楊應桂等以  
來學者衆建書院以處之有廟堂以祀夫子兩廡翼  
焉有明倫堂鄉賢祠元至順三年其孫繁昌尹純仁  
重修虞集記

九川書院在弋陽縣九川明宣德間李文儀與從弟文  
彬建正統間少卿李奎致政歸重建育英堂希賢軒  
尚志軒蕭鎡記之

潭石書院在弋陽縣潭石明正統間御史黃溥建中有

聚星軒育德亭劉雋記之

象山書院在貴溪縣南三峰山下宋陸文安九淵講學之所紹定四年提刑袁甫請於朝遣上舍生洪陽祖即其地建書院中為聖殿翼以兩廡後為彛訓堂翼以居仁由義志道明德四齋堂後為仰止亭有池上建濯纓浸月二亭堂左為儲雲佩玉二精舍右為梭山復齋象山三先生祠賜額象山書院袁甫記元季燬於兵明景泰間巡撫韓雍知府姚堂重建又置田

以供歲祀李奎記正德間提學李夢陽知縣謝寶重  
修嘉靖癸卯知縣袁鳳鳴增修萬歷八年奉例廢天  
下書院祭亦裁知縣伍袁莘捐貲贖復避書院名改  
為象山祠尋奉例通復仍編祭歲久頽圯萬歷三十  
一年知縣吳繼京新之申請陸氏裔孫奉祠自為記  
桐原書院在貴溪縣南十里唐觀察使高寬仁故居至  
宋其七世孫高可仰建書院於此以教其鄉之子弟  
置膳田汪應辰記之元時高惠甫又割田以資書院

費元末盡燬明宣德間其十四世孫高吉昌重新之  
蕭鏃記萬歷癸卯知縣吳繼京重修申請裔孫高紹  
憲奉祠

玉溪書院在貴溪縣南廬坊宋儒廬孝孫講學處元季  
兵燬明弘治間提學黃仲昭訪求故址檄知縣韋厚  
重建鄭節記歲久圯嘉靖丙戌知縣葉良佩規地於  
縣治東重建書院內為祠堂外為講堂徐一鳴記萬  
歷八年奉例廢改為玉溪祠後奉例通復知縣錢邦

偉申請復祭乃構堂一區為講學之所

臨清書院在貴溪縣七都宋儒裴方潤隱居於此元初  
屢薦不起建書院以教鄉黨子弟鄉人稱曰梅隱先  
生

靈谷書院在貴溪塵湖山中元延祐間里人桂本建為  
屋三楹東為端彝齋西為鈍齋其子元方屬王禕記  
之見忠文集

理源書院在貴溪縣五十七都宋儒龔霆松講學處霆

松號良所慨朱陸二家之徒議論不一因窮源委作  
四書朱陸會同註釋三年書始成時稱朱陸忠臣明  
萬歷三十九年知縣錢邦偉額之曰真儒道脉

靜明書塾在貴溪縣元時陳立大家有藏書若干卷又  
所著論語正義二十卷其子善益自尊度題其室曰  
靜明書塾中設先生像春秋祀之危素記

嚴家書院在貴溪縣北高石明嘉靖間邑人徐樾講學  
處取易卦家人名義四方學者咸輳集焉

鷺湖書院在鉛山縣北十五里鷺湖寺傍宋儒朱子陸復齋象山呂東萊講學之所淳祐庚戌江東提刑蔡抗請於朝賜名文宗書院元皇慶二年總管竇汝舟建會元堂詹載采記元末兵燬明初御史祝傑按縣訪求故址得之景泰癸酉巡撫韓雍建祠崇祀復舊額李奎記正德辛未提學李夢陽重建汪偉記萬歷庚寅編修劉曰寧同知縣唐應紹新之劉有記明末編修楊廷麟率進士胡夢秦義耆查懋夔應璋等捐



資重修有記

國朝順治初巡撫蔡士英捐貲重建安煥記康熙二十  
八年巡撫宋學檄訓導郭逢年董修康熙丁酉巡撫  
白潢敬奉

聖祖御書窮理居敬額及

御書章巖月朗中天鏡石井波分太極泉對聯懸掛書院  
按朱子紀年錄淳熙二年東萊歸朱子送之至信  
之鵞湖寺東萊約二陸同會於此相與講其所聞

二陸俱執已見不合而罷復齋詩云孩提知愛長  
知欽古聖相傳只此心大抵有基方築室未聞無  
址忽成岑留情傳註翻榛塞着意精微轉陸沉珍  
重友朋勤琢切湏知至樂在於今象山詩云墟墓  
興哀宗廟欽斯人千古不磨心涓流積致滄溟水  
卷石崇成泰嶽岑易簡工夫終久大支離事業竟  
浮沉欲知自下升高處真偽先湏辨古今朱子後  
三年和詩云德義風流夙所欽別離三載更關心

偶扶藜杖過寒谷又枉籃輿度遠岑舊學商量加  
邃密新知培養轉深沉只愁說到無言處不信人  
間有古今按象山年譜云呂伯恭為鵞湖之集先  
兄復齋謂某曰伯恭約元晦為此集正為學術異  
同某兄弟先自不同何以望鵞湖之同先兄遂與  
某議論致辨後往南康元晦延入白鹿講院因講  
君子喻於義一章元晦再三云某在此某在此不  
曾說到這裏負愧何言紹定間蒙齋袁公甫嘗為

四賢贊又云世謂鷺湖之集諸老先生議論未能  
悉同以是妄加揣摩其失遠矣又云君子講道既  
切之又磋之既琢之又磨之反覆辨明惟求一是  
若慮其不相合心非而口然之此乃淺丈夫所為  
何足以窺諸先生之門墻耶草廬吳澄送金谿陳  
洪範序云朱子之教人也必先之讀書講學陸子  
之教人也必使之真知實踐讀書講學固以為真  
知實踐之地真知實踐者亦必自讀書講學而入

二師之為教一也而二家庸劣之門人各立標榜  
互相詆訾至於今學者猶感嗚呼甚矣道之無傳  
而人之易惑難曉也又按師山鄭玉送葛子熙序  
略云方朱陸二先生相望而起也以倡明道學為  
已任陸氏之稱朱氏曰江東之學朱氏之稱陸氏  
曰江西之學陸氏之質高明故好簡易朱子之質  
篤實故好邃密蓋各因其質之所近而為學故所  
入之途有不同爾及其至也三綱五常仁義道德

豈有不同者哉後之學者不求其所以同惟求其所以異江東之指江西則曰此恠誕之行也江西之指江東則曰此支離之說也而其異益甚矣此豈善學聖賢者哉朱子之說教人為學之常也陸子之說高才獨得之妙也陸氏之學其流弊也如釋子之談空說妙至於鹵莽滅裂而不能盡致知之功朱氏之學其流弊也如俗儒之尋行數墨至於頽惰委靡而無以收力行之效然豈二先生之

之言垂教之罪哉蓋後之學者之流弊云爾又按程敏政道一編序云朱陸二氏之學始異而終同見於書者可考也不知者往往尊朱而斥陸豈非以其早年未定之論而致夫終身不同之決惑於門人記錄之言而不取正於朱子親筆之書耶齋居之暇取無極七書齋湖三詩鈔為二卷用著其異同之始所謂早年未定之論也別取朱子書札有及於陸子者釐為三卷而陸子之說附焉其初

則誠若冰炭之相反其中則覺夫疑信之相半至於終則有若輔車之相依且深取於孟子道性善收放心之兩言讀至此而後知朱子晚年所以兼收陸子之學誠不在南軒東萊之下顧不考者斥之為異是固不知陸子而亦豈知朱子者哉諸論最當并錄之

瓢泉書院在鉛山縣期思渡宋祕閣修撰辛棄疾寓居於此後改為稼軒書院



東岡書院在鉛山縣西石龍東岡坪明正統間費瑄建  
龍山書院在廣豐縣新城鄉宋嘉定間黃運幹德申建  
殿堂齋舍一如學制捐產以奉廩給課試悉仿州縣  
學法真德秀記

河源書院在廣豐縣周安鄉地名巖裏下有泉源湧出  
如星海故名宋嘉定間校書郎周天驥所建與陳克  
齋趙章泉徐梅野劉端明湯息菴趙崇棫講學於此  
瑜山書院在廣豐縣杉溪宋提刑俞拔建義塾集里之

貧士讀書其中

原道書院在廣豐縣何家塢元儒何大衢繪圖以獻欲  
建書院叅政史紫薇為之請於朝賜額原道以奉歷  
代聖賢差山長主教事

岑山書院在興安縣東郭明萬歷間知縣謝光陽建有  
瞻田詳獨孤元記

荷峰書舍在興安縣瑄山明邑人張深建以教其族里  
子弟李奎記

文昌書院在興安縣康熙二十八年知縣曹學雋建置  
贍田

饒州府

鄱江書院在府城北宋朱子門人金去偽講學處絃歌  
巷即其地元設蒙古學於此

忠宣書院宋建於龍山巖祀洪忠宣皓明正德初其裔  
孫洪春請建於府治西丹霞觀故址都御史李瓚記  
玉溪書院在鄱陽石鎮元處士何英建以處四方來學

之士英字積中號梅谷學於王松塢得黃勉齋饒雙峰之傳

白雲書院在都陽東湖洲明初知府陶安以詩名延劉琮玉至因講易安驚曰先生學有淵源非詞章之士詢之知親受業于許文懿者遂為建書院祀文懿即以白雲命名

里仁書院在都陽西隅明淮藩長史潘一諤捨宅為之浮洲書院在都陽浮洲寺明嘉靖間知府應鳴鳳建

芝山書院在都陽白蓮池北明萬歷間叅政舒其志建  
國朝順治間知府翟鳳翥改建府學中崇祀朱子以理  
學名賢配之自為記

希賢書院在府城茶場巷口

國朝康熙二十四年饒南九三府士民請為巡道查培  
繼立生祠培繼不許諸生楊鉞等請以生祠建查公  
講堂又不許檄縣毀之以其材修學宮諸生請改講  
堂為書院乃於其中祀歷代名宦十四人漢九江守

宋均晉彭澤令陶潛唐彭澤令狄仁傑饒州刺史顏  
真卿江州司馬白居易宋知饒州范仲淹知南康軍  
周敦頤朱熹知饒州王十朋樂平令楊簡明巡撫王  
守仁副使葛寅亮饒州知府張有譽

國朝饒州知府翟鳳翥復捐俸置田延師設教南豐湯  
來賀記之培植繼有自撰碑記

滙源書院在永平門畫橋東

國朝康熙二十三年知府黃家遴建聚諸生肄業其中

捐俸以資膏火熊一瀟有記

湖東書院在鄱陽縣學右今為小學中有范文正朱子

二像

忠定書院在餘干縣琵琶洲宋丞相趙汝愚與朱子講道之地淳祐初汝愚子崇憲為禮部尚書請作忠定書院又作羸金樓藏異書元至元間趙孟濟重修楊益記

東山書院舊在餘干縣羊角峰側宋趙汝愚暨從弟汝

卷二十二  
觀建汝愚子崇憲師事朱子於此講學汝愚卒朱子  
來弔復館焉後為胥吏所據邑人李榮庭鬻產贖之  
謝枋得記明弘治二年知縣沈時重建劉憲記尋廢  
正德間巡撫任漢檄知縣徐冠徙建中峰即今址李  
夢陽記

國朝順治間興屯道翟鳳翥重修自為記康熙十二年  
知縣江南齡復建自為記

南溪書院在餘干縣新政鄉宋提刑柴中行講學處理



宗朝中行以右文殿修撰乞歸講學南溪之上其裔  
孫建書院以祠之元延祐間置官掌祠事程鉅夫記  
見雪樓集

南谷書院在餘干縣南極峰明儒胡居仁講學處

長鄉書院在浮梁縣景德鎮宋慶元三年監鎮李齊愈  
請建元元貞二年山長凌子秀朱繼曾請於江東宣  
慰使稽厚以舊基新之延祐間浦江吳萊署山長泰  
定二年進士方回請於總管段庭珪重修之明洪武

初舉朱伯高為山長張京伯為直學四年以徐遜赴  
省主試薦朱伯高為府學教授書院遂廢

新田書院在浮梁縣新田都宋紹興間侍郎李椿年建  
嘉定間李大有率鄉人共新之有大成殿及堂廡齋  
舍置義田數百畝教族子弟延李德俊為師今廢其  
地曰義學塢

雙溪書院在浮梁縣北湖右宋淳祐間邑人趙源置進  
士莊於北湖其孫趙鎮遠以科舉未行莊無所歸至

元間請以莊建書院按察副使粵屯希魯從之進士  
趙介如為山長後廉訪使姚登改創燕居祠人文堂  
四齋別立祠祀朱子金草憲饒雙峰趙介如記之尋  
廢明萬歷甲辰知縣周起元復建天啓間魏忠賢毀  
天下書院遂屬民產

兩河書院在浮梁縣北鄉明萬歷間陳大綬等共建有  
求斯堂喟然閣鄒元標記

銀峰書院在德興縣市延福坊宋淳熙間邑人余瀚余

淵延朱子講學其中明崇禎間裔孫應馨改建於肯  
堂山下

雙桂書院在德興縣游奕塢相傳朱子贈程韓程燧兄  
弟詩君家構屋積玉堆兩種天香手自裁清影一簾  
秋淡蕩任渠艷冶鬪春開書院之名由此

蒙齋書院朱子門人程端蒙講學所舊在德興縣游奕  
塢裔孫程德美重建於縣治東明嘉靖間提學王宗  
沐題額

柳湖書院在德興縣十都朱子門人程珙隱居講學之所明嘉靖間知縣俞玘重建王宗沐書額

深山書院在德興縣八都黃勉齋門人董鼎講學之所鼎子真卿為胡雙湖門人請立書院胡雲峰有詩并額之

初菴書院在德興縣治南宋教諭黃崇建元學士傅立號初菴者捐俸置養士田設山長元季兵燬明改建於瀘田村尚書傅瀚記

息齋書院在德興縣南水綠橋宋儒余芑舒講學之所  
芑舒號息齋故名

國朝康熙間裔孫元馭等重修

拙齋書院舊在德興縣游奕塢宋儒王過講學之所過  
字幼觀號拙齋明萬歷間改建於瞻村

勿齋書院原名四勿齋在德興縣八都宋逸士王億讀  
書於此明萬歷間知縣吳維魁重建改今額

歸軒書院在德興縣八都宋儒鄒近仁講學處明嘉靖

間巡撫汪元錫額之裔孫鄒侃重修

靖翁書院在德興縣版大村宋儒李思正講道之所

二賢書院在德興縣十都宋儒程端蒙程珙各有書院  
明嘉靖間裔孫程德美程一麟等請於巡撫何遷巡  
按鄭本立合祀之錢德洪記

緒山講院在德興縣十七都上田先是嘉靖間庠生王  
守勝等構屋文川聘鄒緒山主教巡撫何遷題額文  
麓精舍萬歷乙未改建今所更額名

興賢書院在德興縣延福坊明萬歷間知縣何鏞課士之所捐置膳田二十畝

國朝康熙二十一年知縣王清彥重修

銀麓書院在德興縣北門外明貢士徐珊講學課文之所門下登進士第者如舒鰲金鉤不一而足稱極盛焉

慈湖書院在樂平縣長樂坊宋楊簡為令以禮讓變俗時號慈湖先生簡沒立書院祀之元至正間縣尹翟



衡重建設山長教學以貢士莊田供祭祀危素有慈  
湖書院贍學田記歲久廢明萬歷間知縣鍾化民別  
建祠於登高山

洎陽書院在樂平縣治左萬歷間義民王邦本建知縣  
金忠士主之陸起龍記天啓五年毀廢

國朝順治十四年知府翟鳳翥重建有記

玉貞書院在安仁縣治後玉貞山麓宋邑人吳紹古建  
象山陸九淵扁其堂曰經德程迥程觀有詩

錦江書院在安仁縣長城鄉宋邑人倪玠講學之所元至正間其子翰林待制倪鏜請賜額王文肅構有記環溪書院在安仁縣崇義鄉宋尚書湯漢曾師事餘干柴中行因建書院今即以為祠

竹庄書院在安仁縣榮祿鄉元邑人李存與吳尊光張仲舉危太樸輩講學之所明永樂間曾孫李復觀重新之

石麓書院在安仁縣瑄溪元邑人陳楨建中有鳳鳴臺

含光亭雪邱鹿泉諸勝藏書授徒其中吳澄揭傒斯  
皆有記

環谷書院在安仁縣榮祿鄉明洪武間學士鄭倫建倫  
號環谷故名

見山書院在安仁縣學左明大學士桂萼建嘉靖御書  
清趣二字又義理完具四字扁其堂巡撫周廣記之  
陽剛書院在安仁縣八都獅子巖明桂華同弟萼讀書

所

石洞書院在萬年縣萬年鄉宋儒饒雙峰初作朋來館  
以居學者後從遊日衆遂建書院元至正間設館廩  
師生以奉祀事明正德間參政吳廷舉副使許庭光  
復建於縣治東知縣白繡主簿吳元著各捐俸鼎新  
之

斛峰書院在萬年縣萬斛山南麓宋尚書李伯玉建

白羊書院在萬年縣新進鄉宋大理寺丞陳嶠建

翠巖書院在萬年縣蒼山宋邑人葉舜民建謝枋得記

南園書舍在萬年縣胡坊宋信州守胡預致政歸建以課其族黨子弟

南康府

白鹿書院在南康府北廬山五老峰下唐貞元中洛陽人李渤與其兄涉隱居九江讀書於此嘗畜一白鹿自隨人稱為白鹿先生寶歷中渤為江州刺史就其地創臺榭引泉流植花木遂以白鹿名洞南唐昇元中即其地建學置田命國子監九經李善道為洞主

號曰廬山國學宋初置書院與睢陽石鼓嶽麓並名  
天下學徒常數百人太平興國二年從州守周述請  
俾國子監給印本九經驛送至洞又官其洞主明起  
為褒信縣主簿七年置南康軍遂屬焉咸平五年詔  
有司修繕之塑聖賢像祥符初直史館孫冕請歸老  
於洞許之皇祐中冕子比部郎中琛因父志增置學  
舍於洞中以教子弟及四方來學者并給廩餼扁曰  
白鹿書堂郭祥正記淳熙六年朱子知南康軍訪白

鹿遺址中明尚書省及禮部檄教授楊大法縣令王仲傑重建書院於是洞學復興呂祖謙記之援獄麓書院例疏請勅額併高宗御書石經與監本九經貯於其中列聖賢為學次第以示學者一時名儒如陸子靜劉子澄林擇之皆來講學乃於建昌縣置東源莊田以給學者八年辛丑遷浙東提舉復遺錢三十萬屬知軍錢聞詩建禮殿兩廡并塑像後二年知軍朱端章加板壁繪從祀諸賢像仍撥浮屠沒入田以

益之嘉定辛巳知軍黃桂重建正殿增闢三門續置  
西源莊田三百畝紹定中知軍史文卿建五經堂淳  
祐間知軍陳洽建友善堂及文昌宮咸淳間知軍劉  
傳漢增置貢士莊元至元間總管陳炎酉修之大德  
間崔翼之置田百畝虞集有白鹿書院新田記元季  
兵燬田亦亡明祖建都金陵取大杉木為御殿白鹿  
之路始通見王禕記正統元年翟福溥守南康率僚  
屬捐俸剷穢除荒規制復舊胡儼記景泰間知府陳



敏政重建貫道橋成化三年提學李齡增廓之置學  
田祠器聘胡居仁主洞事有記七年提學徐懷置樓  
賢橋田八百七十畝弘治八年提學蘇葵撤而新之  
嗣後提學邵寶李夢陽唐錦徐一鳴王宗沐巡按陳  
銓唐龍徐岱蕭端巡撫何遷知府陳霖羅輅王溱何  
巖張純知縣崔孜相繼興理增置田廬有差萬歷七  
年大學士張居正請禁偽學詔毀天下書院鬻田以  
充邊需巡撫邵銳以白鹿書院有勅額不便拆毀量

留田三百畝備祭祀巡道王橋隨請留星都二縣田  
其建昌縣千餘畝俱變價解司十一年給事中鄒元  
標請復書院先是有紅鶴百十巢於後山松杪書院  
議革時鶴忽飛去後三年鶴復巢書院遂復叅政程  
拱宸檄知府潘志伊修宇贖田規制粗定十七年提  
學朱廷益禮聘布衣章潢主洞事十九年知府田瑄  
立鹿洞懇館增置田七百畝四十二年叅議葛寅亮  
大加修葺增置號舍建鹿眠亭四十五年知府袁懋

貞聘南昌舒曰敬主洞事天啓壬戌舒以讀禮還推  
官李應昇主洞事崇禎十三年提學侯峒曾與撫按  
會請翰林李明睿主講席

國朝順治四年知府李長春五年知府徐士儀相繼修  
葺十二年巡撫蔡士英檄南康府縣修堂廡清洞田  
十四年重建大成殿知府薛所習增撥學田康熙元  
年巡撫張朝璘加修六年推官巫之巒修橋坊十六  
年知府倫品卓詳請修院添設號舍布政姚啓盛提

學邵吳遠捐金重新殿廡二十二年巡撫安世鼎委  
巡道查培繼重修聘南豐進士湯來賀主洞事并  
題請匾額經書二十六年

聖祖御書學達性天匾及十三經二十一史遣官送書院  
四十八年南康教授熊士伯詳請專祀朱子巡撫郎  
廷極布政傅澤淵議從之名紫陽祠五十一年提學  
冀霖重修續置學田五十五年知縣毛德琦清洞田  
重刻白鹿書院志按志禮聖殿兩廡大成門櫺星門

而外為堂者八曰明倫堂文會堂攝儀堂十賢堂講  
堂友善堂成德堂為閣者三

御書閣聖經閣雲章閣為臺者二勸書臺釣臺為亭者二

十二風雩亭風泉雲壑亭好我亭枕流亭自潔亭觀  
德亭光風霽月亭太極亭喻義亭庶眠亭百花亭獨  
對亭朋來亭釣臺亭大意亭高美亭聞泉亭六合亭  
思賢亭如見亭原泉亭宰牲亭祠五紫陽祠宗儒祠  
先賢祠忠節祠諸葛武侯祠廟一七姑廟他如精舍

號舍憩館貢院射圃倉廩庄屋坊橋之修葺及主洞姓名學規祀典書籍田賦具詳洞志雍正四年巡撫裴率度重修增建書院三層為屋七十有三間上為書樓前砌花牆為二門外為頭門為亭三曰肅容曰如見曰五星五星亭之左建魁星樓洞之西建庖房三間分察劉均有記

修江書院在南康府城朱子知南康軍時邑人游其門者建

廬陽書院在南康府城明洪武初邑人黃仲美建解縉  
記

龍潭書院在星子縣南龍潭里明初邑人查琛建以教  
其宗黨琛子桴登永樂甲申進士官禮部郎中余鼎  
記

經歸書院在都昌縣西山元儒陳浩與雙峰饒氏註禮  
記集說號雲住師因名其書院曰雲住後廢明成化  
間學士劉定之建議謂浩釋經之功雖未敢肩程朱

亦可以決胡蔡欲比何休賈逵范甯杜預等例從祀  
聖廟弘治間允提學邵寶所請勅有司葺祠致祭知  
縣王珀創建正德四年知府陳霖置祭田五畝六年  
知縣徐冠建牌坊于書院前

匯東書院在都昌縣治西明萬歷間遷儒學於小南門  
外因以舊學為之崇禎十三年復移學治西遂廢

曾公講堂在都昌縣學右

國朝康熙戊午知縣曾王孫建以講學課文



弘齋書院在建昌縣治東宋李文定燾讀書處明嘉靖  
間知縣顧陽和建萬歷間知縣費玠于文定祠後設  
齋舍至今生儒肄業焉

扶風書院在建昌縣相傳漢馬季長講授處有祀田五  
十畝後廢為僧寺

國朝雍正六年饒九道劉均捐俸金購還復捐金修葺  
聚生儒肄業其中詳均自記

甘棠書院在建昌縣元至元中建明洪武間邑人趙宗

信即其址重建教諭張湜記

北山義塾在建昌縣北明景泰間邑人李誠為溧陽令  
致仕歸建此以萃一鄉子弟而教之

石潭書院在建昌縣石潭山明熊德明建

雷塘書院在安義縣南一里亦名雷湖書院宋至道中  
勅旌義門洪氏令有司築書堂以淑其子孫楊億有

記

社平書院在安義縣北烏溪宋嘉祐間義門陳思悅建

九江府

景星書院在府城東唐元和中召李渤為右拾遺不就  
韓昌黎遺之書云朝廷士引領東望若景星鳳凰爭  
先覩為之快渤乃就命長慶中刺江州後人因建書  
院名曰景星元末燬於兵今東嶽廟即其故址

瀟溪書院有二一在府城南十里宋周元公過潯陽愛  
廬山之勝因其麓有溪取故里之號名其溪曰瀟溪  
築書室於上淳熙三年州守潘慈明增築焉朱子有

記明正統初御史徐傑項璉副使焦宏陳玠仍遺址  
重建提學邵寶奏著祀典給田贍其後嘉靖中戶部  
主事祖瑀鰲石刻太極圖說樹之寢殿副使謝迪同  
知姜輅撤而新之濬蓮花池弘治間主事鄭汝美嘉  
靖間主事鄒輓萬歷間叅議葛寅亮先後修葺一在  
城內豐儲坊明嘉靖間兵備陳洪濛建祀濂溪先生  
以二程配之構書室五重令諸生肄業其中

靖忠書院有二一在九江府學前蓮花池明成化五年

知府蘇致中建祀晉陶潛唐狄仁傑嘉靖間戶部主  
事鄒輓即堂東隙地構號舍以便生徒肄業後改為  
名宦鄉賢祠一在彭澤縣北觀音巖後本唐天祐中  
三學堂故址元至正四年縣尹王國輔建以祀陶狄  
二公後增祀趙昂發號三賢祠尋廢邑人王演疇購  
復舊觀

陽明書院在府城南三里許明萬歷間兵備葛寅亮建  
中為像堂左右有講習堂司香所典器所置田一百

七十畝自為記後推官姚士豸兵備陸夢龍增置膳田以供來學

國朝順治十六年推官胡宗虞重修

肄武書院在府治東九江衛門內明嘉靖初兵備何棐以武弁子弟無教乃創正廳旁翼廊房命學官一人領其教

嚶鳴會館在德化縣明邑人文士弘建每月四日為小會孟月九日為大會與湯文禎何一化輩聚徒講學

焉

李渤書堂在德安縣使君山塢唐長慶間渤為江州刺史見其山水明秀築堂於此今其址尚存

河東書院在德安縣河東即宋時儒學舊址明嘉靖間知縣蔡元偉建堂舍為書院令諸生肄業其中

東佳書院在德安縣東林山下唐義門陳袞建聚書千卷以資學者子弟弱冠悉令就學一名義門書院宋

徐錯有記

蔡氏義學在瑞昌縣元邑人蔡季霖建其子士仁修室  
宇贍供給延名師以教其鄉黨子弟虞集為之記

懷溪書院在瑞昌縣新河南明萬歷間知縣陳鼎訓導  
葉濟英建有記

成德書院在湖口縣成德嶺即宋儒學舊址明嘉靖間  
署縣同知吳淞建御史張科主事段孟賢增號舍尚  
書張鏊記崇禎十年知縣陳文德增修

聯雲書院在湖口縣僧官巷明萬歷五年知縣陳啓明



改小學舊址為之後為民佔崇禎十年知縣陳文德  
修復

射圃書院即湖口縣射圃亭址先是嘉靖間知縣沈詔  
建觀德亭翼以號舍崇禎十年知縣陳文德增建大  
堂三楹左右學舍四十餘間為諸生肄業之所

### 南安府

道源書院在大庾縣學東宋慶歷丁亥瀛溪周敦頤為  
南安軍司理程珣以興國令攝判事遣二子受業焉

乾道乙酉軍學授郭見義闢屋一楹繪三先生像祠之自為記嘉定己卯知軍劉強學改闢於縣學東淳祐二年漕臣江萬里屬知軍林壽公創建書院寶祐三年知軍吳革據教授趙希哲狀請勅額越三年知軍郭廷堅又狀請詔下南安軍以周程書院為道源書院仍令教授兼山長景定四年理宗賜道源書院四大字建雲章閣以藏之有租田以贍學者元泰定甲子推官汪澤民建大成殿後山長劉偉節葺之有

記明初廢景泰四年知府金潤重建成化間知府姚  
旭知縣夏璣重修侍郎葉盛記弘治十三年圮於水  
知府盧濬復修祭酒謝鐸記正德十五年知府何文  
邦擴其制建光風霽月亭嘉靖己酉知府陳堯再新  
之萬歷初奉文廢書院尋復巡按陳效知府宋萬葉  
推官鄭道典知縣劉宦成擇地重建

國朝康熙三十八年知縣楊允中重修

仙堂書院在大庾縣常樂里元至元間里人王邦叔建

以訓族黨子弟延祐庚申其子晉卿漢卿同舉於鄉  
滕玉霄高尚鳳劉山立均有記

梅國書院在府城西門外明兵備陶諧為刑部侍郎劉  
節建知府陳健有記

旭嶺書堂在南康縣治北二里明嘉靖二年通判黃廷  
宣因宋相陳升之書臺舊基重築十三年知縣汪宣  
之丞王泰倡導士民構堂及樓隆慶間知縣余世儒  
重修聚邑士講學其中

太傅書院在上猶縣治西北禮信鄉宋淳祐十二年知  
南安軍陸鎮行縣見太傅山林壑幽美請於朝建設  
書院立山長以教授之撥妙聖寺田五百有奇以膳  
學者先是唐末本里石門村人盧光稠節度本州兼  
治韶州韶人德之為立廟詔贈太傅故山以太傅名  
書院又以山名元大德間縣簿劉彝訓延蔡壁為山  
長文教大振祐間達魯花赤伯顏察兒復撥書院  
田大修葺之

興文書院在上猶縣治東一里明弘治間知縣章爵建  
萬歷間知縣擴懷德重修李文瀾記

蔚起義塾在崇義縣十字街東

國朝康熙三十二年諸生陳日昇捐建

贛州府

瀛溪書院有三一在府城鬱孤臺宋瀛溪先生通判虔  
州與二程先生講學後人建祠於贛水東玉虛觀左  
元末兵燬明洪武四年知縣崔天錫重建知縣陳益

民繼修弘治中知府何珙始改建於鬱孤臺羅璟記  
正德中巡撫王守仁遷舊布政司故址匾曰濂溪祠  
堂崇禎間因遷縣學知縣陳履忠於光孝寺左建廉  
泉書院並祀東坡濂溪兩公

國朝順治間度撫劉武元改曰濂溪書院推官周令樹  
知縣楊文正設濂溪二程文信國木主於大堂春秋  
同丁日祭東西兩廡池上構愛蓮亭有亭臺以居諸  
生講學肄業其中後為守兵所據知府郎永清移檄

營帥歸還庠士康熙三十三年知府任進爵贛南道  
白啓明重修巡撫宋榮顏曰真儒過化後巡撫郎廷  
極學使王鯨皆有額四十八年知府朱光圉又修葺  
之餘具詳碑記雍正元年贛南道王世繩捐俸增修  
給廩餼聚諸生肄業其中延南豐進士趙與鴻主講  
席一在雩都羅田巖為明儒何廷仁黃弘綱羅洪先  
講學所一在安遠縣老教場明隆慶間知縣周景建  
先賢書院在府城阜城坊東宋澹軒楊先生故宅其門



人陳鞞請於朝賜額以祠淳熙甲午提刑趙改修元  
大德間山長王天與重修歲久傾廢明正德間通判  
鄭暹重修後為居民所占知府邢珣清出改為義泉  
書院即今東坊社學

按府志云尚有正蒙書院今廢

陽明書院在府城濂溪書院後明南贛巡撫王守仁講  
學處

新建勲業氣節文章皆可甲世特多講學一事讒

言惟興彝尊少聞先君子之言矣心齋顏子之學也良知不動心孟子之學也大學思復戴鄭之舊定論幾息齋庶之爭仁知之見各殊楊墨之歸斯受其後流而為禪者門弟子之過也今就先生之詩觀之其過濂溪祠云瞻依多少高山意曾向圖書識面真讀易云乃知先天翁畫畫有至教題武彝壁云溪流九曲初諳路精舍千年始及門示程畢二子云紫陽山下多豪俊應有吟風弄月人則

先生何嘗立意樹幟張弧與洛閩諸儒異乎乃訾訾之口以先生學術未純并先生大節疑焉素然欲染為緇彼譖人者亦太甚矣

朱彝尊詩話

龍溪書院在雩都縣治南二十里明成化間袁慶祥讀書所慶祥登進士第知府邢珣匾曰龍溪書院即今龍坑菴

思皇書院在雩都縣生佛寺東明萬歷間知縣賽登臯建又小西門外有龍門書院

桃溪書院在信豐縣桃江口邑人盧敏建時代失考

桐山書院在信豐縣學內

國朝康熙三十六年知縣方正玉建

崇正書院在信豐縣學右明知縣洗克建祀虔撫王文成

安湖書院在興國縣衣錦鄉宋咸淳八年知縣何時建以課士文信國天祥記之又為三程祠久廢明洪武間知縣唐子儀重建正德十四年遷於城內東大乘

寺中祀三程周元公東為李君行祠西為鍾令公祠  
傍列主敬行恕修德凝道四齋更徙置文信國碑記  
萬歷三十一年知縣何應彪改為名賢祠增祀王文  
成書院之名遂廢

鴻飛書院在興國縣西門外明萬歷間知縣何應彪建  
長春書院在興國縣南門外明萬歷間知縣吳宗周建  
梅江書院在寧都縣北拱宸橋宋淳祐六年知州夙子  
興建祀朱子門人曾興宗元延祐乙卯兵燬明年監

州伊遜布哈重建至正十年知州趙天澤學正李實  
重修危素有梅江書院高明樓記

湘江書院在會昌縣射圃後明嘉靖間知縣沈桂同邑  
人賴貞捐建羅念菴題額曰仰高堂旁列齋舍三十  
餘間以居來學者

綿江書院在瑞金縣西舊學基明嘉靖間知縣王鈺建  
四十年閩廣寇發駐兵於縣改為行臺書院之名幾  
泯隆慶三年知縣呂若愚恢復故址增建號舍以居

諸生立陽明王公像於中而以前令王鈇配之扁曰  
綿江書院自為記萬歷間邑人復以呂若愚附配書  
院堵奎臨記

文成書院在瑞金縣西門祀陽明先生

國朝順治五年廣寇至避寇者久據院中傾毀殆盡康  
熙三十三年諸生劉嘉廣朱衣繡等清復舊址知縣  
田俞倡率紳士重建

太平書院在安遠縣太平堡明隆慶五年知縣周景建

今改為公館

龍城書院在龍南縣南門內

國朝康熙二十八年知縣郭世逢建有記

琴江書院在石城縣治南宋時所建後改為府館

龍門書院在石城縣西騎馬嶺明萬歷三十五年知縣

黃廷鳳建有記

右書院二卷白志考訂甚詳今概仍之

江西通志卷二十二